



China aser Russia joint
military drills tenzükogo

Callum Wilson West
Ham nung denogo



Catholic nun ana aser tribal tetsür asem apuba NPF-i aitsü

Dimapur, Luroi/August 3 (TYO): Chhattisgarh nung nisung shibelenba aser nüburtem tamangba yimsü melendaktsütsü merangba atema aija Catholic nun ana aser tribal tetsür asem apuba Naga People's Front (NPF)-i aitsüogo. Iba amala tatalokba ajanga lokti nung nütsüng agi ajema aliba teloktem anema inyakba aser aiben iba amala ken o ya teyazü tashishiba nungi adokba indang sayur.

Ken o dak sendakba nung kuli tejangja mali aser extremist telok kati iba ya rongmesoba lir asünung, iba ajanga humanitarian mapa nung sendaka alirtem merenshitsü atema legal provisions tem

mashiyimi amshiba süoki ia bilem tenzükogo. Christian missionary temi shilem balala agiba aser talisa tribal loktem balala nem parnoki teyari agütsüba ya aküm tsübuttsü nüngdaker.

NPF-i, Chhattisgarh sorkar dang mapang atakzüka yur kecha tebandang makai bushisingdangtsü mepeshia metetdaktsüogo. Parnok aitsüba ya tamendakdak makara pua alirtem ya tangsa tang chioktsüla aser teyazü nung parnok aitsürtem ya merenshitsüla, ta NPF-isa ashi. NFP ochi obendang, secularism aser lisopur ajak nem kasa temeden agütsütsü atema nokdaka lir, ta kasa sangdong ajanga metetdaktsü.

'At Home Reception' nung adentsü Tamsutola Jamir jaok

Kohima, Luroi/August 03 (TYO): Taküm Independence Day mapang Rashtrapati Bhavan nung President of India-i ayongzüka 'At Home Reception' nung adentsü asoshi National Awardee for Persons with Disabilities Tamsutola Jamir jaoka lir.

Lai talisa saisapong aser shisaliok nung matamabensar asoshi alakteta mapa tajung inyakba asoshi 2022 küm la nem Hearing Impaired (Female) category kübok National Award ya agüja liasü.

Tang Tamsutola Jamir ya Chümoukedima nung Samagra Shiksha kübok tenarong



majunger asoshi resource teacher ka ama inyaker, aser tenarong majungba agi school-i motetba tanurtem nem kidang shisaliok agütsür.

Framework Agreement aser Agreed Position khenyongi balala: NSCN-IM

Dimapur, Luroi/August 03 (TYO): Naga political solution atema arok tangatetba aser tejangraba bushitetsü asoshi Working Committee, Naga National Political Groups (WC, NNPGs) den külemi inyak nung junger ta angateta lemsatepba nungya lendong lir, ta NSCN-IM ajanga ashi.

Framework Agreement züluteper küm ter ajungba bilemteta sentong ka nung jembidang, Naga nungertongtipang telemteba agütsü tensa ka nung lir, kechiaser NNPGs temi Naga political solution indang Constitution of India kübok jembir aser Government of India dak tashi aliba ama parnok kibur masü, ta NSCN-IM chairman Q. Tuccu-i ashi.

NSCN-IM-i iba ama telok den külemi inyaktsü tebilema mebilemer, kechiaser parnoki Naga lima temeden asoshi akumtsübo mali, ta pai ashi.

Naga political solution atema NSCN-IM nungi tejangja lenir den sako asütsü mechi Government of India-i NNPGs ya yanglua mashi lenmangi anitsü atema "Agreed Position" zülutep. Government of India den jembishinüba mapang Naga nungertongtipang nung puti otsü aser yimten

tensa waozüka meytetba telok den külemi inyaktsü NSCN-IM-i kodanga memerangtsü.

Naga political solution nung tangatetba balala aliba teloktem den NSCN-i sapang lemsateptsü ya tamakoktsü. NNPGs indang ashikülak politics temai adokogo. Anungji Framework Agreement aser Agreed Position ya khenyongi balala aser onokibo kodanga majuruteptsü ama angur, aser iba ama ashikülak aser telemsa adokdaksünertemi Constitution of India kübok Naga nungertongtipang ka arudaktsütsü meranger, ta Tuccu-i ashi.

Iba Framework Agreement yagi Naga lima aliba jangjaja Amsterdam nung July 11, 2002 nü Indo-Naga Political Talks alidang Government of India-i Naga nungertongtipang puti otsü khenyongi balaka aliba agizüka lir.

Alima matsüngdang kuli süa Framework Agreement zülutepba nung shia aliba ama Tsüngremi agütsüba linük maitsü asenoki kumzüka meytetba, Naga nungertongtipang mabensa ama asütsü, ta pai ashi.

Asenoki temulung agütsütsüla aser saksalema alitsüla, kechiaser telemsa adokdaksürtemi Framework Agreement

aidoktsütsü meranga nemzür aser yamaji inyakra Naga nungertongtipang puti otsü ajanga samatsütsü.

FA ya political document ka dang masü saka asangsang nung langka ka makumdang asenoki inyaktsü mapa jenti lir, ta pai ashi.

Azü, atsentsü aser nüktzü tokshia küm aika anibelem mesasai inyaka arur asenok tashi meiti makumtsüla, saka Framework Agreement nung aliba ama inyaktsü züngzükteptsüla. Danga lenmanga lir, saka asen Tsüngremi agütsüba puti otsü kumzüka ayutsü asoshi asenoki maneni nokdaksüla, ta NSCN-IM chairman-isa ashi.

NSCN-IM aser Government of India tsüngta otsüsütsü Framework Agreement ya August 3, 2015 nung zülutepa liasü. Iba political agreement nung Government of India-i Naga nungertongtipang shidak ta agizüka lir.

"Asenoki takok ngur aliba, linük ka ama asen temeden shidak tanaben agütsü merangba maparen maneni inyaktsü. Government of India-i tasa balala amshia atsülangaka, asenoki timtem balala ajanga bendanga agütsür FA nung nokdaka lir," ta pai ashi.

New Riphyim village nung shiti agi nisung ka tepset

Kohima, Luroi/August 03 (TYO): New Riphyim Village nungi arishi küm 72 tain aluyimer Rentsamo Odyuo ya Honibarnü par rubber lu nungi kidangi meyipa shilangba mapang arem shiti kati tepset.

Honibar nikongdang pa samaba ajanga yimdaklirtemi

Deobarnü pa bushi tenzük aser parnoki pa tsümang ngutet aser temang nung shiti agi yirutsüba zübu tem keta liasü.

Iba yimtsüng nung alirtemi ashiba agi, shiti chanu densema shiti 15 shi yimtsüng anasa arua amungba ajanga aluyimba aser süngjang-lijang

tsünüba aser anogoshi mapa balala inyakba nung kanga timtem agüja arur.

Arem shiti ajanga tanen makai alu aser ki o jen raksatsüba aser ketdangsür temi parnok kumzüka meytetba atema yimdaklir temi tezü atangba lemsatepa liasü.

Tanur tetsü ka tepsettsü merangba anema NAWO-i longkak ait



Tanur tetsü ka tepsettsü merangba anema NAWO-i longkak aitba noksa nung angur.

Kohima, Luroi/August 03 (TYO): Tanur pezü tetsü ka dak tashiyim amshia shi nung medemtsü merangba aser züka merenshiba aija Northern Angami Women Organisation (NAWO) ajanga Honibarnü Razhu Point, Kohima nung longkak aitba sentong nung tetsürtem timba sür tesem balala nungi nüburtem Angami sobaliba sübotsü sübor

shilem agia liasü.

Kohima district kübok Tsiemekhuma Basa Vallaga nungi Savituo Kense'er jabaso arishi küm 19 tain Khrietuolie Kense-i tetsürla dak July 16 nü Botsa yimtsüng anasa la alu nungi meyipa kidangi shilangba mapang iba mapa tamajung ya inyak ta tai tonglokja lir. Pa ya tang judicial custody nung lir.

Longkak aitba nung dena lir ta temaitsü sayua state yimtiba nung longkak aitba mapang dokan aser business establishments tem shibanga liasü.

Longkak aiter temi ozüng kübok ochi obendang aser temerenshi tulu agüjang ta khanga placards aser banners bener adenshi. Parnoki Deputy

Commissioner, Kohima indang office tonga tetsüng agi oa tezüluba nung takhangba agüja liasü.

Parnoki takhangba agütsüba nung NAWO-i iba mapa tamajung khukhua aitsü aser ibai kanga junga sentong yanglur inyakba lir ta ashi.

Tetsürla ya alu nungi meyipa shilangba mapang tai tonglokja alisangi lenmang nung atsüka atar kotari agi atsüng aser tashiyim amshia shi nung medemtsü aser tepsettsü merang, ta NAWO ajanga memorandum agütsüba nung shia lir.

Tetsürla tekong, teka aser tenarong anasa kotari agi aiben atsüng aser süyi-sübonger tem arudang tai tonglokja alisang ya jena ao.

Mapang tatsüka lir iba nisungba ya lanurtemi apu aser police nem agütsü.

NAWO-i ketdangsür dang

ochi nung bushisingdang asütsü ajungshi aser tai tonglokja alisang nem bail magütsütsü ashi.

Parnoki tetsür anema mapa tamajung inyaker nem temeden agütsüba tebilemtsü lemsatep aser criminal justice system takang aser tajung ka nüngdaker ta parnoki ashi.

"Iba ama tasü mait aser nisung meimchir mulungsentsü maliba mapa ya tetsür ka dak kisüng kongshir masü saka tetsür ajunga dak kongshiba lir," ta memorandum nung shia lir.

Temerenshi tesashi agütsütsü aser tetsürla aser lar kinunger kumzüka ayutsü asoshi mera agütsüla, aser tai tonglokja alisang civilized society nung alitsü malang, ta NAWO ajanga ashi.

Onoki ozüng amshiba agencies dak tamang akar, saka obendang ya tejangja aser tekeraba nung agütsütsüla, ta parnoki ashi.

People's Democratic Alliance Mokokchung District pur Tsüngremmung among



People's Democratic Alliance(PDA) Mokokchung District pur tanu Rempo Dikhu Road nung Tsüngremmung benjong sentong nung adener lenirtem tangokba noksa.

Mokokchung, Luroi/August 02(TYO): People's Democratic Alliance(PDA) Mokokchung District pur tanu Rempo Dikhu Road nung Tsüngremmung benjong sentong kanga dang longso longsoa kaogo.

Tanü iba sentong nung Hon'ble MLA & Advisor Wb.Imkong L.Imchen-i jembidang tanu ama benjong nung longsotepba dang masü saka asenok telen ajak nung longjema alitsü nungtaker, asenok longjemera tangar makoktsü, anungji asenok longjema alitsüla, shingai Aor

lemsatsü meblemetsüla. British nung marudang asenok ya Aor ta sür dang liasü tzükonga maliasü, British nung aiter kelen parnok parnok yimsü asütsü asoshi lemsaba dang lir, anungji akhi ama asenok Aor ta sür ka küma longjemmer lida Tsüngremmung bejongmunger ayongzüka liasü.

Advisor Imkong-isa Nagaland nung tang major political party-ji NDPP aser BJP teloktep party ya lir, iba teloktep party ana ya ano tang dang nungi tashi taitiba nung aotsüta ashi.

Sentong nung Tsüngrem lenisüba jazüka Wt.Senlemtula VP NDPP Mkg Region(WO) sarasadem aser Wb.O.Tinu Lkr BJP Mokokchung District President-i tarur pela agizüka jembia iba den NDPP Mkg.Region Vice President W b . M a r c h i z ü n g - i Tsüngremmung ratet lemsatet, NDPP Women Organisation-i sobaliba ken tajung ka aten aser Melepzüng o NDPP Mkg. Region President Wb.Repameren Yaden ajanga melepzüng o jembia teloki külemi sarasadema iba sentong tembanga liasü.

BAN-i ayongzüka Dr. J. Alam IAS den tepila sentong agi



Dimapur, Luroi/August 3 (TYO): Business Association of Nagas (BAN)-i ayongzüka tanü Nagaland Chief Secretary Dr. J. Alam IAS (Retd), den tepila sentong ka agiogo. Iba sentong nung Chumukedima Deputy Commissioner, sorkar tenzüker tejentem aser BAN indang executive council züngsemtem aser ketdangpurtemi shilem agia liasü.

Sentong nung o jembiba mapang Dr. Alam-i, Chief Secretary ama Nagaland nung aliba nüburtet tenzüka ya pa taküm nung tetushi tulutiba liasü, ta ashi. Paisa, BAN ya state nung rongsenketzüng inyakyimtem nongita yariba lokti tentet ishika aliba rongnung ka lir ta shia parnok nem tenüngsang agütsü.

Tang tetsükdaktsü aser

tayongzüka balala aliba indang jembiba mapang pai, Nagaland ya alirongsen aser human resources nung kanga takar lir aser küm 20 tsüngda developed state jenjang ajangzüktetsü, ta ashi.

Paisa, tawa India nung Chief Secretary ajak den senden amenba mapang Ato Kilonseri Nagaland nung terenlok asoshi lenmang balala sadema lapoka aliba indang minute 20 shi jembia aser iba tesem terenlok atema linük rangloker lir ta ashiba metetdakja liasü.

Sentong nungsa BAN tir L. Mongkum Jamir-i, tatishitsü tajung sayua nüburtet tenzüka atema Dr. Alam nem tenüngsang agütsü aser ashiba agi, tetenzüküji tongtibang saka tatembang agi nisung ka taküm inyakyim jangjatsür, ta ashi. Dr. Alam indang career ya

yimsüsüba tajung tatishitsü ka lir, ta paisa shisem.

Maneni pai, Dr. Alam-i ajemalua, meranga aser bendanga agüja inyakba atema pa nem tenüngsang agütsü aser arishi küm 60 ya tapak tasen ka tetenzüker dang lir, ta ashi. Arishi küm taiba akümba den tajangshiba aika bena lir asünung pai maneni linük tenzüka lisopurtem dak kongshitetsü, ta tir-isa shisem,

BAN-i mepeshiba ama Alam-i takaratiba nung jenjang agia MSME Directorate-i Joint Director ka yokba ya mapang kanga tajung liasü ta ashiba den anüngdaka aliba ken o tem pa melener den inyakteptsü ta ashi.

Sentong nung shilem agirtemi Dr. Alam mapang tajung asoshi tenüngsang agüja standing ovation ka agüja laisü.

AO OSHI RENLOKDAKTSÜBA

TOKTEP AYONGZÜK-III



TAYONGER: TIR YIMYIM & BOOKIPEDIA MOKOKCHUNG

Bookipedia FOUNDATION

Yimdangjem Otsü Zülü Toktepb
(Fiction Writing Competition)

KECHI INDANG OTSÜ ZÜLUTSÜ?
Nisungtem asoshi tatishitsü aser tansütsü aketba otsü mashika zülutsü akok.

SHIBAI SHILEM AGITETTSÜ?
Tazüngba aser küm tasazük kecha mali tetsür tebur ajaki shilem agitettsü.

KOMA SHILEM AGITSÜ?
Yimdangjem otsüji ojang (word) teimtiba agi 4000 tashi nung zülutsüla.

OTSÜJI TANGAR NUNGI AJIZÜKBA MASÜ, PEISASA YIMDANGI ARUA BILEMA YANGLUBA OTSÜ KA ASÜTSÜLA.

KONG KOMA YOKTSÜ?

Item tetoktepb nung shilem agirtemi MS Word/PDF nung tiryimiyim@gmail.com dangi pei tenüng den tetsü aser tebu tenüng, yim aser talidak tenüng den tongtepratepdak phone number dena zülur September 31, 2025 anogo tashi nungbosa yoktsüla.

KECHI SEMPET AGÜTSÜTSÜ?

Iba tetoktepb nung tajungtiba asem nem senpet yamai agütsütsü :

Mezüng tajungtiba jenjang – Certificate den sen Rs 20,000

Tanabuba tajungtiba jenjang – Certificate den sen 15,000

Tasembuba tajungtiba jenjang – Certificate den sen Rs 10,000/-

METETPELADAK :

Iba sentong dak aketba maparen nung metetpela nura imlibilema mobile number 81319 29284 & 87875 84752 nung tongtepratepangma.

Tanü tensa den apet asen tangatetba melenshitsüla: Imlimeren Jamir, IRS



Dimapur, Luroi/August 03 (TYO): Ongpangkong Senso Telongjem Dimapur ajanga August 2, 2025 nü Don Bosco (DBIDL), Riverbelt Colony, Dimapur nung Academic Excellence Award sentong ayongzüka agiba mapang, tarutsü nung takok tajung timba ngutetsü asoshi tali meranga inyaksüla, ta sentong nung tajungshi o jembir Imlimeren Jamir, IRS, Commissioner of income Tax (Appeals), Jorhat ajanga HSLC examination 2025 nung Dimapur nungi Ongpangkong nungeri tematiba jenjang nguteter ayongzüka liasü.

Takok anguba ya pei sasa meranga inyakba kisüng agi masü saka tsürabor temi ajungshia aser khuret bena sarasadema ajanga lir, ta pai tsürabor nema tenüngsang agüja liasü.

Akhidang ama sorkar mapa kisüng bushiba, doctor, engineer dang azüngba ama masü tanü asüng lima ya quantum computing, artificial intelligence aser crypto currency agi anir, anungji asenok tangatetba melenshitsü nüngdaker, ta pai ashi.

Sorkar mapa tajemba akumer, aser nisung jakibo sorkar mapa mangutsü, anungji asen tekolok salatsü mapang tongogo. Alima nung itasen

timba agirtemji investment bankers, scientist aser CEOs temiya lir, anungji asenokia sorkar mapa kisüng mebushie item lenmang nunga rangloksüla, ta Imlimeren Jamir-i ashi.

Küm ishika shi-azü jangraba azioktetra ibaji ajanga nü arishi tepiyong asoshi jenjang yanglutetsü, ta ashi.

Na kechi jenjang nung lidir liaka ajemalutsüla, pei sasa tamang akatsüla, tamakok ajurudang temulung ajema malitsüla, medemer tajung ayimtsüla, nü tera mamadoktsüla aser tongtipangsa Tsüngrem mamadoktsüla, aji süra nü takum nung takok alitsü, ta pai kaketshirtem ayongzüka.

Iba sentong tenzüka Rev. Wati Kichu, Associate Pastor, DABA ajanga sarasadem; OSTD tiri pela agizükba o jembia; Mefutiba, Convener, OSTD Academic Award Trust ajanga tayongzüka o jembia aser Repasosang-i temeja ken tena liasü.

Maneni Ongpangkong nungeri Dimapur nungi HSLC examination 2025 nung tematiba jenjang angur Mechali Longkumer (Longsa) top 8 aser Imliyanger Jamir (Ungma) top 13 natia tepela o jembia liasü aser tena nem OSTD ajanga sempet agüja liasü.



Patna, August 03, 2025: Patna nung JD(U) MLA, Chetan Anand-i AIIMS hospital nung tashiyim amshiba anema doctor temi longkak aitba noksa nung angur.

Pune nung telok ana tsüngda raratepba sülen nisung 15 puogo

Pune/New Delhi, Luroi/ August 03 (Agencies): Pune yimti kübok Yavat yimdak telok ana tsüngda raratepba sülen police-i nisung 15 apu aser nisung 500 dak tema anema ken o benokogo.

Hokolbarnü WhatsApp nung tashishitsü osang ka prokba nungi tamanger telok ana tsüngda raratepa liasü.

Lanur kati WhatsApp nung lemsatepbaji yimdaklirtem aikati ashishi. Police-i WhattsApp nung tashishitsü osang upload asüsangjia puogo.

Yimdaklirtem jagi tejashi nung longkak aita gari aika rongdoksüba den külemi kiojen aika nung mi senokja liasü. Longkak aiter lokti jagi motorcycle ka den gari ana, bakery ka aser tekülem ki ka rongdokja liasü.

Iba tensaji aziüoktsü atema

police-i 'tear gas' amshiba den külemi ajok agi loktiji zükshia liasü. Iba tesem nung tensa tamajungba makümtsü atema curfew özüng benokogo.

Yavat police station nung Senior Inspector Narayan Deshmukh-i, "Tang tashi nung nisung 15 puogo aser parnok August 6 tashi police ket nung ayutsü. Iba tatalokba dak sendakba nung onoki ken o benokogo," ta metetdaksü.

Ken o pezübo kiojen rongdoksüba ken o lir, iba dak alia nisung 500 anema ken o benokogo; iba nungjagi CCTV noksa aser tenük kuli nung ajemdaker nisung 100 maitsübo jangjaogo, ta police-i metetdaksü.

Osangbenertem den jembidang Superintendent of Police (Pune Rural), Sandeep Singh Gill-i, mezüng

bushisüngdangba ajanga iba ya jelia asalentong yanglur inyakba masü ta jangjaogo, ajisüaka maneni bushisüngdangdar, ta metetdaksü.

"Y i m d a k l i r t e m jashidaksütsüsa osang lemsatepsangji kasa yimdak nungi lir aser iba yimdak küm aika alir. Onoki iba ken o ya lenla ajaklen nungi asadangdar, ajisüaka tang tashi nungbo kuli mejangjar," ta Gill-isa metetdaksü.

Sorkar ketdangsertemi yimdaklirtem dang süngjemtsü mepishiba den külemi mejangjaba osangtem mashie social media nung meproksüla, ta metetdaksüogo.

Yavat nung tensa terabo süngjemogo, ajisüaka tensa tamajungba mekümdaksütsü atema tang tashi police tali yoksema lir.

Pahalgam amaksang asüpila sentong ajanga Pakistan-i shilem agiba jangjar

New Delhi, August 03 (Agencies): Pahalgam amakba nung shilem agir kiralongrartem rongnung ka, Tahir Habib asüpila sentong Pakistan-occupied Kashmir (PoK) nung par yimdak agiogo, aser iba sentong nungji LeT züngsema liasü.

Ibaji ajanga taküm April 22 nü Pahalgam amakba nung Pakistan-ia shilem agia lir ta jangjar, ta osang ka ajanga metetdaksü.

Taoba mapang Pakistan army aser Lashkar-e-Taiba (LeT) züngsem asüpila sentong Rawalkote nung agiba noksa aser video aika prokshiogo. Asüpila sentong nungji local LeT commander Rizwan Hanif-a liasü.

Tahir'er kibongi asüpila sentong nungji LeT züngsemtem madentsü jelia

metetdakja liasü, ajisüaka Hanif-i iba sentong nung adenba ajanga rongrong adok.


Jammu & Kashmir kübok Pahalgam amakba nung Tahir-i shilem agia liasü. Taoba hopta Srinagar nung sepaitemi 'Operation Mahadev' kübok kiralongrartem mita aoba mapang Tahir densema kiralongrar asem khaset.

Asüpila sentong nungji LeT züngsemtemi mangyimertemji prangpong amshia amokmerena liasü, aser ibaji ajanga yimdaklirtem kanga jashidaksü.

Khai Gala yimdaklirtemi joko kiralongrartem anemtsü telemtetba agiogo.

Taoba mapangtem nung Tahir-i Islami Jamiat Talaba (IJT) aser Student Liberation Front (SLF) nunga shilem agia liasü, iba sülen pai Pakistan army nung aden.

Kerala nung Doctor Rairu Gopal süogo



Dr Rairu Gopal

New Delhi, August 03 (Agencies): Kerala state kübok Kannur nung nüburtem nem jenjang kanga dalang agi treatment agütsüsang, Dr Rairu Gopal, Honibarnü alima nungi pilaogo; pa arrshi küm 80 liasü.

Pai rongsen marishii nüburtem kanga meima angati meyong yariba agi pa dang "Two Rupee Doctor" ta jaa liasü.

Dr. Gopal-i tesüiba küm 50 dak tali nüburtem dang medical consultations atema sen 2 dang agia aruogo. Pai talisa kanga sensakertem yari. Pai shiranger lakh 18 dak tali yariogo.

Tamalen pa nem Indian Medical Association (IMA) indang 'Best family doctor in Kerala' award agüja liasü.

Dr. Gopal nem tetushi agüja Kerala Chief Minister, Pinarayi Vijayan-i, "Pa ya nüburtem doctor liasü" ta metetdaksü.

Chief Minister-i, "Aso tesadang (küm 50) shi pai medical consultation atema sen 2 dang agi, aser ibaji ajanga ajaki treatment agiteta liasü. Pai nüburtem yaritsü melungtetbaji mezüngdangtetba shirangertem atema anisüngzük tulu liasü," ta metetdaksü.

Dr Gopal-i anepdang 3:00 ako nungi tenzüka shirangertem yari, aser ibaji

talisa school azüngertem aser aayangertem mapai maodang treatment agitetsü atema liasü.

Pai anogo shia shiranger 300 dak tali yaria liasü.

Dr Gopal-i anepdang shia 2:15 ako nung saakba sülen nashi nem chiyungtsü agüja nashi ki merüktet aser mamatzü yima liasü.

Iba sülen pai sarasadem aser nashi mamatzü lema liasü. Iba sülen nungibo pai anogo piyong shirangertem anepalua liasü.

Temang reprangdaksütsü atema nisung noklang aika tarensena nokdakbaji pa kinüngtsü, Dr Shakuntala aser pa indang assistant ka nati ketdangsüa anepalu aser mozü agütsüba nung tenati yaritepa liasü.

Pa tain küma temang tamajungba akümdang temang tendangtsü atema pa ajurur shirangertema tajemba-tajemba dang aküm.

Dr Gopal tebu, Dr A. Gopalan Nambiar-a Kannur nung ajaki kanga akhümtsübuba doctor ka liasü. Tebui pa dang, "Nai sen aatsü bilemra doctor masü tanga mapa ka dang inyakang," ta ashibaji pai kodanga mamadoki liasü.

Dr Gopal'er adianu ana-Venugopal aser Rajagopal nata doctor tem lir.

Linük tatong Tirji BJP-i shimba candidate asütsü: Shashi Tharoor

New Delhi, August 03 (Agencies): Linük tatong Tir election agütsü mapang ana nung lia Congress MP, Shashi Tharoor-i, taruba linük tatong tiriji shiba asütsüar pai memetet, ajisüaka ibaji tejangja ruling BJP-i shimba candidate asütsü, ta ashi.

Tharoor-i, "Ibaji atangji ruling party-i shimba candidate asütsü, ta ajaki meteta dang lir, kechiyong asenoki electorate züngsemtemji meteta lir. Ibaji Parliament House anaprong nungi lir. Tir election nungbo state assemblies-ia vote agütsür

saka tatong Tir election nungbo Lok Sabha aser Rajya Sabha nung züngsemtemi dang vote agütsütsü. Anungji asenoki majority ji shirnokar meteta dang lir. Taruba tatong tirji atangji ruling party-i shimba candidate asütsü," ta ashi.

Paisa, "Iba atemaji parnoki (BJP) opposition den-a jembitsü onoki imlar," ta ashi.

July 21 nü Jagdeep Dhankhar-i ajungbena tatong tir menden nungi anena liasü. Pa kümsük abensatsü atema ano küm ana anünga lia pai

ajungbena menden nungi anen. Tamalen linük tatong Tirtem - V V Giri aser R Venkataraman natia kümsük mabensadangyongi tatong Tir menden nungi anena liasü, ajisüaka tenabo Tir election nung tokteptsü atema tatong tir menden nungi anenba liasü.

Taruba tatong tir election nung Congress party-i aniba opposition-ia külem candidate ka shima toktepdaksütsü akok, ajisüaka tang Parliament House anaprongla nung BJP-i aniba NDA züngsem teimba lir.



Mumbai, August 03, 2025: Mumbai nung Ganesh Chaturthi benjung jakdang Hindu nungertemi Ganesh tsüngrem süngyanglu 'pandal'-i bener aodang tangokba noksa nung angur.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 04, 2025

Mapa agi Benjong

Asenoki benjongji benjong, mapa teinyaktsü kecha maka, shi angö den chia jema pelatepa amongtsü amai dang bilema Moatsüa aser Tsüngremmung amonger. Ajisüaka, alu mapa inyakba agiang item sobaliba benjong amonger, kechiyong asenok sobaliba benjong ajak alu mapa dak sendaka lir. Ibaji dang masü saka benjong amongtsü ana terenemba mapa tapu aika lir aser item rongnung tongtimbang anaji ka alu lenmang apitsü aser kaji benjong atongtsü anogo ka lia arem nungi süng bendena bener adoktsü, ajisür külenang anogo pezünü pongunü agia benjong amongtsü. Ajisüaka, tanü asenoki amongba Moatsü aser Tsüngremmung benjong yabo mapa inyakba shilemji ajak endoker chiyongtepa amungba shilemjiang agiteta 'donation' agi benjong amunger. Iba ama mapang ka nung, taküm 2025 küm Chümoukedima nung alir Ao Lanurtem Telongjemi yimkong lenmang merükteta aser apu dena sentsü melenja inyaka Tsüngremmung amungbaji Temelenshi Putu nung Temelenshi Inyakyim tajung ka sayua sobaliba benjong amongba ka asütsü. Ibaji tetenzük ser sangküm nungibo Aor alidak ajak nung tsüklusa yima meliaka, Moatsü lenpi aser Tsüngremmung lenpi ayongzüka bendang semer na den asenok alidak yimkong lenmang aser yimkong meyong tongtimbang tesemtem merüktetja sobaliba benjong among tenzükra, iba jagi tanü putu den apet asen sobaliba asentenshitsü aser yimkong asoshi mapa tajung inyaktsür asütsü. Atangji, asenok dang masü saka alima nung kechi kin südirsüaka mapa inyakba agiang benjong amonger, anungji mapa meinyakra benjong amongtsübaji nüngdak madoker aser mongdi asüyonga benjong amongtsüsa mapa meinyakertem dak tashi aser temoatsü malitsü. Aji oda, Naga nungertem rongnung asen Ao kin a alu mayim asübo Moatsü aser Tsüngremmung benjong amongtsüsa nüngdak madokla. Ibaji kodang asenoki angatetdir, asenokia mapa meinyakbo benjong memongnüsü, anungji tangar den toktepa benjong amongtsü asoshi mapaa tangar den toktepa inyaktsü. Ibaamaji meranga inyakba agiang, asen tsüraburtemi tekong nung tsük lu kisüng ayimba agi nashi aser sü chia yimboksüa yimkong chiyongdaksütsüsa takar kuma inyaktet aser pei chinurtem asoshia tenüng tajungji senmang kuma naroküm tajung angu. Aji oda, tanü asenok rongnung nisung kar danga takar tenüng jaa lira, aji asenoki aazükba naroküm masü saka akhidang otsüla aser oboula nunger anü aser tsünglu manung tsük lu yima takar akümba naroküm lir ta bilemtetdi. Iba ama mapa inyakba nungi akaba agi takar naroküm ajatsüsa ngutetba tenüng tajung aser benjong amongba sobaliba indang ya tang ama asenok Tsüngremmung amongdang bilemteta ajungshiteptsü kanga nüngdaker. Tanübo asenok Aorbo tajangzük maliba agi tekong nung tsüklu ayimba mapabo anenogo, iba jagi tanü putu nung akhi otsüla oboula nunger putu nung alu nung metsü rema toktsür Moatsü benjong amongba aser aluro tenzüktsü asoshi Tsüngremmung benjong amongba mapang aser sentong mapet benogo. Ibayongji, tanübo asenok meyong benjong amonger ser nung benjong tetezü aser teratet ashitsüsa akümer. Aji oda, alu nung tsük metsü rema yutsür amongba Moatsü aser alu nung tsük aro tenzüktsüba benjongTsüngremmung amonger ser nung, tanü asüng chirtemibo pei nük agi tsük mengudang, dokan nungi alia bener aruba tsümar jang dang angu nungji, tsükji kechiar memetet ser Moatsü aser Tsüngremmmung amunger. Atangji, asenok government aser private mapa nung aser ano business mapa tapu balala nung mazüngi mapa inyakertema aika lir, ajisüaka alu ayimba nungi tsük adoker aser tsük agiang jang akümer ta memetetba nübortemji asenok kümogo. Ashiko, iba jagi asenoki sobaliba benjongmung amongtsüa mejangrar südi. Ajisüaka, asenok tsük lua mayim aser sobaliba benjonga mamong ta ora, küm ishika tsüngda asenok ya kidongjibo yutsür, kechi kin ar memetet kümadoktsü. Atangji, putu den mapa aser inyakyim melener asünungji, tajangzük melira tsük lusa mayimyonga kecha masü, saka kechi lu yimdir aser kechi mapa inyakdir, item ajak nungji Tsüngremi dang moatsür ta bilemtetba sobaliba benjongbosa amongtsüla, idangji Chümoukedima nung alir Aor lanurtemi inyakba mapatem bilemtetdi.

OLEMSABANG

Tepela mulongjangji mozü tajung

~ L. Kika Pongener

(Yashi adok nungi...)

Chirnur mapang shitak nung timyimi azüoka indaktsütsüla. Tsürabur o chirnur tsüngda tesendaktep tajung ayutsüla aser teti kibong tekülem akatsüla. Tsüraburi chirnur ajak nem pei dak apet mapa lemsa-a agütsütsüla, chirnur koleni aor, mapang shitak nung kidangi shilanger asü meshilanger (?) Ibaji tsüraburi tenuk zünga reprangtsüla aser kibong nung alir ajunga mapang ka nung külemi chiyungtsüla. Aji oda, kibong nung libaliruyim aser tazüokba (Discipline) iba amaji yutetra aser litetra, kibong nung teti pela-a alitsü. Kibong nung anema junga pelaa lira asen temulongjanga teti pelaa alitsü.

Loktiliba balala nung tenzük dang asenok pela-a linura, asen tenzükba lokti nung asen nem kechi mapa inyaktsü nungloktsüdir, külem tenzük aser asen madak lenniri temulong asütsüsa, junger ta ashitsüsa inyaktsüla. Külemi tenzük aser ajak den amaa-litepa, putepa, kati ka taoba ta akümtsübutepa tenzüktsüla. Kati ka tashimaitba nung yariteptsüla aser kati ka den ajungshitepa nungitpepa tenzüktsüla. Külem tenzük aser kari mapa tajung kar inyakra, mesura mapa kar nung shilem tajung agia inyakra, kanga junger ta tenungsang agütsütsüla. Asen tenzükba mapa agi temulong sua, tenuk sunga aser jangra-pangraa dang tenzüktsüla. Asen tenzükba lokti inyakyim aser sentong ajunga agi temulong chia aser pelaseta tenzüktsüla. Asen tenzükba yimden, arogo aser loktiliba inyakyim / sentong agi temulong masü, taa/ itasen agi tenuk masüng, inyakyim ajak nung ya-a majung aser ya-a meshitak ta teti mulong mesui tenung sena dang tenzükra, asenok kodanga pela-a malitsü. Kechi tensa tia ajurudir ajuruaka ajak nung temulong chia pelaseta tenzüktsüla. Asen madak lennir dang akümtsübuttsüla aser asen küpok tenzükertem den küsasa liromedema litettsüla. Nisung ajak den yimjung nung alitsüla aser tulur-tilar ajunga den küsasa liromedema litetba taküm asütsüla. Asenoki iba amaji shitak liteta tenzükra asenok teti pela-a alitsü.

Nisung ka taküm nung teti pela-a alitsü atema pei temang shi (Physical body) nung tarak meketdaktsüi kümdanga anepalua merukmejua alitsüla. Temang nung tashitak tamajung agi matongtsüsa kanga ashiteta kümdanga alitsüla. Tsüngrem o-i ashir...Asenok temang ya Tsüngrem tenlaki lir..."Nenok Tsüngrem tenlaki, aser Tsüngrem Tanela nenok dak alir ta nenoki memetet no ? Nisung kari Tsüngrem tenlaki raksara Tsüngremi pa raksatsü; kechiyong Tsüngrem tenlaki temeshi aser ibaji nenok lir" (1 Korint-3:16). Asenok temang ya Tsüngrem tenlaki, anungji iba tenlakji menentsüsa aser raksatsüsa temesepba chiyungtsü chira, chidiyungdi mazüokra, mekümdangi lira aser taküm masüngteti lira, iba tenlaki nungji tarak akettsü aser tashitak tamajung agi akettsü.... Aser temang nung tashitak tamajung ketra pelaa melitettsü. Anungji pela-a linura asenoki asen temang anema alitsü asoshi asüngteta, merukteta, kümdanga alitsüla. Asenoki aji oda, litetra asenok teti pela-a alitsü. Tsüngrem o-i ashir... "Tepela mulongjangji mozü tajung lir" (A. Shin-17:22). "Teti pelaang" (1 Tesa-5:16). Asenok temang, tokolok shisatsü aser tanela ajunga anema aser pela-a alitsü asoshi asüngteta, merukteta kümdanga lidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Brazil nung tetsür telok kati jail semdanga osangtajung lemsatep



Brazil kübok Goiás state nung Khristan tetsür telok kati jail ka semdanga tepuokdak alir tetsürtem tetsüng shidoktsüdang tangokba noksa nung angur.

August 03, 2025: Brazil kübok Goiás state nung Khristan tetsür telok kati jail semdanga tepuokdak alirtem tetsüng shidoktsü aser Khrista osangtajung lemsatep. Yisu Khristai sayuba benshia parnoki tepuokdak alirtem tetsüng shidoktsü, Kibuba benjung agi aser Khrista osangtajung lemsatepa liasü. Brazil nung aliba IDE Arogo nung pastor, Shaila Manzoni leniba nung parnoki tesüiba küm aika jail balala semdanga arudar. Lai tentetba organization A.M.E. (Ame Mulheres Esquecidas)-i jail balala semdanga tepuokdak alir tetsürtem den osangtajung lemsatepa arur. Manzoni-i, "Tamanger ka ama mapa agi inyaka sayutsü atema Yisu Khristai asenok ajar. Tetsüng shidoktsübaji tajaba ka lir. Kibur-alar tangatetba Yisui raksatsü aser Kibuba yimli indang sayu," ta metetdaksü. Parnoki jail semdangba mapang nung tepuokdak alir tetsürtem den külemi ken aten, Tsüngrem O lemsatep aser Kibuba benjung agi. Tepuokdak alir tetsür karbo kanga ajep, kari sarasademdakja liasü aser karbo baptiogo. A.M.E telok ya 2018 küm tenteta liasü. Pastor Manzoni-i

Khristan nütsüng teimba aliba linüktem ishiba dang kümdar

August 03, 2025: 2010 küm nungi 2020 küm tashi nung alima nung Khristan nütsüng teimba aliba linüktem kanga ajema kümogo, ta Pew Research Center indang report ka ajanga metetdaksü. 2010 küm nung alima nung linük/territories 201 nungi 124 bo Khristan nütsüng teimba aliba linüktem liasü, ajisüaka 2020 küm nungbo Khristan nütsüng teimba aliba linük 120 dang aküm. Iba tetezü Khristan nütsüng teimba aliba linük pezü ajema kümogo. Iba tasadangba nung züngokba linüktem shilem 60 bo Khristan nütsüng teimba aliba linüktem lir. Küm 10 tejaklenbo Khristan nütsüng teimba aliba linüktemji shilem 62 liasü. Khristan nütsüng teimba aliba linüktem tajemba-tajemba dang akümba ya nisung aikati Khristan yimsü toktsüba agi lir, ta iba report ajanga metetdaksü. 2010 küm nungi 2020 küm tashi nung United Kingdom, Australia, France aser Uruguay linüktem nung Khristan nütsüng teimba aliba jenjang makai kümogo. Item linük pezü nung

joko Khristantem shilem 50 dang nungi tajemba kümogo. 2020 küm tashi nung South America nung Khristan nütsüng teimba masüba linükji Uruguay kija lir. Uruguay nung nütsüng shilem 52 bo tamangba yimsü kecha den-a sendaktepa mali aser nütsüng shilem 44 dang Khristan nütsüng lir. U.K., Australia aser France linüktem nung joko nütsüng teimba aliba yimsü kata mali, ajisüaka mamanger nütsüngji Khristan nütsüng dang nungi teimba kümogo. Ano linük ana- New Zealand aser Netherlands nata kasa mapang (2010 nungi 2020) nung mamanger nütsüng teimba kümogo. 2010 küm tashi nung mamanger nütsüng teimba aliba linüktemji China, North Korea, Czech Republic, Hong Kong, Vietnam, Macao aser Japan linüktem dang liasü. 2010 küm tashi nung mamanger nütsüng teimba aliba linük tenet liasü saka 2020 küm tashi nungbo mamanger nütsüng teimba aliba linük 10 kümogo. Mamanger nütsüngtem rongnung Tsüngrem dak mamanger aser Tsüngrem

i pungmang nung lai jail ka nung tetsür ka ajunger senzüa pungmangba sülen lai iba telok tentet. Küm ana lir 2020 küm mezüng la leniba nung AME züngsemtemi jail semdanga liasü. Iba mapang nungjagi tenzüka AME organization-i osetsüsset aser senotsü teyari agütsüba den külemi training courses agütsür, legal teyari aser tanelar sentongtem katsür. Tesüiba küm pongu tsüngda parnoki tepuokdak alir tetsür 800 tetsüng shidoktsüogo, tetsür 202 baptitsüogo, hygiene aser chiyungtsü kits 2,160 agütsüogo aser legal teyari 555 ben agütsüogo.

ANO GO ABEN TSÜNGREM DEN

Nüktzü yima sarasadem

"Kechiyong Yisui pa shi anogo nung, pa tasü nungi shibai kümzüksü akok, pa dang kanga ayimtena aser nüktzü agi sarasadema mepishir külen, pai kanga akhümtsübuba asoshi pai mepishiba angashi." - Ibri 5:7

Yisu sarasadem nungi asenok tangazüktsü jenti lir. Tsüngremi asenok Pa chir Yisu mesüka kümdaktsüner. Yisu ama asen takümji linera pai koda sarasadem yamaji asenia sarasademtsüla. Tamanger aikati Yisui timtema sarasademba ama timtemji maginer kechiyong iba nung ya mapang indokba, ajeba aser nüktzü ayimba lir.

Saka kechiba Tsüngremi Yisui sarasademba melangzü? Yisu menen yong masü mesüra Tebu Tsüngremi pa memeimba yonga masü. Asadangtsü makokba temeim liaka Tebui ma ta ashi kechiyong alima kümzüktsü asoshi Yisu taküm bendanga agütsütsüla. Tsüngremer sentong aser teküzmükba mapa nung na aser ner kibong amshitsü atema Tsüngremi tetibo nai mepishiba nung hai haura makatsü akok.

Nai nüktzü yima sarasadem yonga khen khenbo Tsüngremi nü sarasadem melangzütsü. Nai timtem jenti agiyonga pai melangzütsü. Ano mapang kar nungbo nai Pa kanga akhümtsübu nung aser nüna tesendaktep tajung alinung Pai nü mepishiba angashitsü.. Oh Oba, Nü mulung süang ta Pa dang shidi.

Yisu ama tali ni kümdakjang. Amen

Yimsü meyipdaksüba atema Pune nung America nunger ka apu

August 03, 2025: America yimsütembo taila ta ashi, ta nunger ka aser India nunger ka nati senotsü agi mesüzüka tangartem Khristan yimsü dangi meyipdaksütsü merang, ta tai tongloktsüba nung ajemdaker July 28 nü Pimpri Chinchwad police-i tena puogo. Police-i apuba America nungbaji California nungi arrshi küm 41, Schaefer Javin Jacob lir aser pa den külemi apuba India nungbaji arrshi küm 46, Steven Vijay Kadam lir. Javin Jacob ya Pimpri Chinchwad nung Mukai Chowk anasa alir aser Vijay Kadam ya Pimpri kübok Rasoni society nung alir. Police-isa arrshi küm 16 tainlonglong kata apu, ajisüaka pajibo chiokogo. Pimpri nung alir Sindhi nunger Sunny Bansilal Danani-i ken o agütsüba nung ajemdaker police-i Jacob aser Kadam na apu. Danani-i police dang, Amongnü 12:30 ako meta par asem jagi par ki semdanga pa dang, nai Khristan yimsü agizükra nai tepela, tesünep aser rongsen angutsü iba denji külemi na taküm anema alitsü ta ashi, ta metetdaksü. Parnokisa pa dang, Yisu Khrista ya dang Tsüngrem lir aser tanga tsüngremtem aser

Danani-i, "Parnoki kü dang, nai Khristan yimsü dangi meyipra sen agütsütsü, ta ashi. Ibaji ajanga kü melung yirua ni police ajurutsü telemtetba agi," ta metetdaksü. Iba nungji ajemdaker police-i Bharatiya Nyaya Sanhita kübok tapet arla nung ajemdaker ken o benok aser Jacob anemabo Foreigners Act kübok arla 14(b) aser (c) anema ken o benok. Senior Police Inspector Ashok Kadlag-i ashiba agi, 2016 küm nungi tenzüka Jacob-i tourist visa aser business visa nung India tenetben semdangogo. Taküm July 5 nüa pa indang visa atsülanga liasü. Kadlag-isa, pa India nung textile business inyaker ta ashi, ajisüaka bushisüngdangba ajanga iba osangji tai ta metetogo, ta metetdaksü. Police-i ashiba agi, Jacob aser Kadam na sarasadem sentong ka nung mezüng ajurutepa liasü. Investigation officer Police Inspector Vijayanand Patil-i, ketdangsertemi tenaprong indang phone meshizükogo aser bushisüngdang tenzükogo, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tesasa**

(adj) tepela jakden aser tejembinü (cheerful, open hearted)

* Tesasa nisungi tangar mulunga peladaktsür.

Tesasa

(v) süitemer tejashi ta ashiba (don't regret)

* Ni tamakok angudang kütsüi tesasa ta ashi.



Tir Yimyim

OLONG PAITEP # 7229

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S ____ i
9. Nisung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

-

(5)

-

(5)

-

(5)

-

(3)

-

(3)

-

(4)

-

(3)

-

(3)

-

(5)

-

(5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

-

(9)

-

(5)

-

(7)

-

(9)

-

(7)

-

(5)

-

(5)

OLONG PAITEP # 7228 TELANGZÜBA**TIPIEN :**

2. Bangsemo, 6. Tiptem,
8. Jen, 9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

Tetsür badminton asayartem ronung smash takaratiba amaba asayar ter:

SUPER SMASH LEADERBOARD		
WOMEN'S SINGLES		
	KPH	
1	PUSARLA V. SINDHU	397.2
2	BUSANAN ONGBAMRUNGPHAN	388.8
3	KIRSTY GILMOUR	368.2
4	GREGORIA MARISKA TUNJUNG	363.7
5	JULIE DAWALL JAKOBSEN	360.6
6	BUSANAN ONGBAMRUNGPHAN	360.1
7	SIM YU JIN	359.3
8	SIM YU JIN	358.7
9	CHIU PIN-CHIAN	358.1
10	AN SE YOUNG	357.9



VICTOR CHINA OPEN

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

WATTSVILLE

Minister Rupesh-i Dighaltarang Tea Estate semdang

Minister Rupesh-i Dighaltarang Tea Estate semdangba mapang tangokba noksa angur.

Guwahati, Luroi/August 3

(Agencies): Dighaltarang Tea Estate nung mejangjaba nisungtemi gari ka dak injang khaloktsüba sülen Assam Cabinet Minister Rupesh Gowala-i Honibarnü iba süngolu ya semdangogo.

Süngolu koba Doomdooma nung Baghjan Police Station kübok lir, iba süngolu nung ya July 29 aonung security dak sendakba nung mepetmesü adoka liasü.

Item nisungtem yagi süngo tu aika auya aser jena mao tsüngda aonung iba süngolu anüker ka indang gari nung injang khaloktsür jena ao.

Lendong nung shinga miyiru, saka süngolu nung inyaker aser staff tem teküzmükba kübok maliba indang süoki ia bilem

tenzükogo.

Iba tatalokba dak sendakba nung telangzüba agüja iba tesem nungi nüburtemi shimba lenir Minister Rupesh Gowala-i Honibarnü süngolu ya semdanga tensa asadangogo.

Pai X nung post ka ajanga ashiba agi, "tawa kü indang constituency nung Baghjan PS kübok Dighaltarang Tea Estate nung mejangjaba nisungtemi July 29 aonung süngo tu auyaba den aonung süngolu anüker ka gari nung injang khaloktsüba sülen jena ao. Iba süngolu ni tanü semdanga tensa asadangogo aser police dang aibelenalir takaratibanung pua merenshitsü tetutyuba agütsüogo."

Minister-i tetuyuba agütsüba dak ajemdaker district

administration-i kanga kara jenjang agiogo. Ketdangsürtemi iba süngolu anüksü atema police aika yokogo, meita aoba sentong tali kümdaktsüogo aser süngolui aiba aser adokba tesemtem nung checkpoints tasen amenokogo.

Assam Police-isa, aibelenertem jangjatsü atema süngolu temeket nung aliba tesem nung CCTV footage tem asadangogo.

Süngolu semdangba mapang Minister Gowala-i süngolu nung mapa inyakerem, security staff aser iba tesem nung alirtem den ajurutepe liasü. Pai, state sorkari parnok nongita yaritsü tenangzüka agütsüba den yimjung nung alitsü koda tongtibang iba indang lemsatepe liasü

Manipur police-i temesepba mozü shibelener pezü apu**Imphal, Luroi/August 3**

(Agencies): Manipur nung Churachandpur aser Kangpokpi district nung temesepba mozü shibelenertem anema jenjang agiba mapang tetsür asem densema nisung pezü puogo.

Police-i pua aliba nisungtem ket nungi heroin, brown sugar, opium, ganja, WY tablets amala temesepba mozü den sen aika ngutetogo.

Police-i ashiba agi, meita aoba sentong balala ayongzüka agiba mapang apuba temesepba mozü ya international shishilembadak sen crore 45 alang asütsü.

Osang tejangja angazükba sülen state aser centre indang security force temi Honibarnü Kangpokpi district nung tesem ana meita oa liasü.

Parnoki Narcotic Drugs and Psychotropic Substances (Amendment) Act of 2023 kübok nisung asem pua liasü.

Sepaitemi pua alirtem ya Kangpokpi ward No. 9 nung alir Ms. Lhingneichong; Gamgiphai yimtsüng nungi Ms. Rebecca Haokip aser Saikho yimtsüng nungi Paotinkai Khongsai ta jangjaogo.

Meita aoba mapang sepaitemi brown sugar seret 2.61, opium seret 2.88, ganja

gram 140 aser sen 23,100 nguteta liasü.

Ketdangsürtemisa mobile phone 14 ngutetogo, koba temesepba mozü shibelenba nung amshi asütsü ta bilemer.

Churachandpur nung tanga meita aoba sentong ka nung sepaitemi Vaal Veng yimtsüng nungi Ms. Chiinlunniang apu. La ket nungi WY tablets seret 2.4 shi nguteta liasü.

Police-isa, lai amshiba Bolero Pickup gari ka puogo.

Aija alir pezüprongla ya the Narcotic Drugs and Psychotropic Substances (Amendment) Act of 2023 dak ajemdaker aitsüogo.

Mukul Sangma-i NPP-i aniba Garo council aitsü**Shillong, Luroi/August 8**

(Agencies): Meghalaya nung Opposition lenir Mukul M. Sangma-i, centre sorkari special assistance grant sen crore 100.71 agütsüba mashiyimi amshiba atema NPP-i aniba Garo Hills Autonomous District Council (GHADC) Executive Committee aitsüogo.

Senotsü ochi meshi-i amshiba ken o ya tang Meghalaya Lokayukta-i bushisüngdang südar.

Sangma-i ashiba agi, senotsü ochishia mamshiba ajanga state nung autonomous district councils (ADCs) asemprongla tenüng menükogo

aser parnok tarutsü raksaogo.

Item senotsü ya India sorkar, Meghalaya sorkar aser A'chik National Volunteer Council (B) nunger yongtsü nung tenangzükepba yangluba nung shilem ka liasü.

Tenangzükepba nung Centre-i Constitution Sixth Schedule yanglushitsü atema tenangzüka ka agütsür lir saka tang tashi mapa küma benoka mali.

Taoba mapang Meghalaya chief minister Sangma-i ashiba agi, pai aniba sorkari Centre dang ken o bentettsü atema ADC tem nem senotsü teyari indang indanga agütsütsü khangzüka liasü.

2015-2016 nung Centre-i KHADC, JHADC, aser GHADC nem indang indanga senotsü agütsüogo. GHADC-i sen crore 100.71 agizüka liasü. Sangma-isa, senotsü ya memonui dang agütsü, saka mapang tatsüka dang lir senotsü mashiyimi amshiba osang temai adoka liasü.

Ken o ya RTI atema mepeshiba nungi tema adok aser tang formal tashishiba benoker lir.

Sangma-isa, tekübokba jenjang nung yimsüsüba tashi itshidaktsütsü atema agütsüba senotsü ya mepetmesü aketba ken o ang ka akümba atema sasaba lemsatep.

China aser Russia joint military drills tenzükogo



Beijing, Luroi/August 03 (Agencies): China aser Russia nati Sea of Japan nung joint naval drills tenzükogo, kechiaser linük ana ya tesendaktep nung tashi itshitsü aser United States-i aniba global order den kasa tokteptsü meranger.

China aser Russian sorkar tsüngta tesendaktep akangshir küm ishika arur, kong Moscow-i Ukraine amakba mechi anüolen linük temi temerenshi/tenokdangba agütsüba nung China ya Russia asoshi economic lifeline ka amai lir.

Joint Sea-2025 exercises ta Russia indang rongnendak Vladivostok tesem anasa tzüyim nung tenzük aser anogo asem alitsü, ta China indang Ministry of Defence ajanga Deobarnü sangdong ka nung ashi.

Linük ana yagi "submarine rescue, joint anti-submarine, air defence and anti-missile operations, aser maritime combat" agitsü.

Iba exercises nung guided-missile destroyers Shaoxing aser Urumqi dena China nung rong tulu pezü den Russia nung rong tem shilem agitar, ta ministry ajanga ashi.

Drills agiba sülen linük ana ya Pacific nung tapet tzüyim nung naval patrols agitsü.

China aser Russia nati küm shia drills ya 2012 nungi tenzüka "Joint Sea" exercise nüngja agütsür ayongzüka arur.

Taoba küm drills ta China indang southern tzükum anasa agia liasü.

Taküm Sea of Japan nung iba drills agitsü aliba indang taoba ita annual report nung Japan indang Ministry of Defence-i Russia den China mitkar tesendaktep tali züina akumba ya security tsütsü teilemtsü tulu lir ta shia liasü.

"Exercise ya defensive yimya nung lir aser danga linük dak rangloker inyaker masü," ta Russian Navy Pacific Fleet

ajanga hopta tetenzüklen shia liasü.

Linük ana indang "strategic partnership" tali akangshitsü nükjidadong nung taküm exercise ya alir, ta Chinese Defence Ministry ajanga Hokulbarnü ashi.

Russia-i küm asem dak tema Ukraine amakba nung China-i khen danga par anema ola adoka mali, aser US densema Ukraine tembar linük temi Moscow nem Beijing-i teyari agütsür ta amanger.

Taoba ita European lenirtemi China dang par jenjang amshia Russia dang rara anentsü ajungshitsü ayongzüka liasü, koba joko küm pezü buba nung ayaokogo, saka Beijing-i yamaji inyaksü kecha yimya nunga mesayur.

China ya neutral party ama alitsü ashir aser mapang shia rara anentsü ayongzüker aser kasa mapang anüolen linük temi Ukraine nem nok-nü agüja rara atsülangdaksür ta aitsür.

Ukraine-i drone amshia amakba; Sochi oil depot nung mi adok

Moscow, Luroi/August 03 (Agencies): Russia indang Black Sea len Sochi nung totzü ayuba tesem ka nung mi tulu adoka lir, aser ibai Ukraine nungeri drone amshia amakba lir ta Russian ketdangsür temi tai tongloksür.

Krasnodar Region Governor Veniamin Kondratyev-i Telegram nung ashiba agi, drone teraksa agi fuel tank ka nung kongshi aser firefighter 127-i iba mi remseptsü meranger.

2014 Winter Olympic Games aliba tesem, Sochi anasa airport nungi tayimtsü senzükba mapang tatsüka soita liasü.

Kasa mapang Russia nunger missile kati Ukraine south tsütsü Mykolaiv yimti nung nisung aliba ki aser civilian infrastructure raksatsü ta yangji aliba ketdangsür temi ashir.

Iba yimti nung civilian tenet yiruba osang lir, kong Russian sepaitemi tanen makai maka arur. Yirur alir nisung asem mozük kidang anepalu, ta Ukraine indang State Emergency Service ajanga ashi.

Russia south len Ryazan, Penza aser Voronezh yimtitem nung installations nung tenük yoker hopta tatemlen Ukraine-i drones aika yokba rongnung Sochi refinery nung kongshiba ya ka lir, ta Russian ketdangsür temi ashir. Drone kati nisung pezü yirutsü, ta Voronezh indang governor-i ashi.

Ukraine-ibo Russia south len amakba indang kecha shia mali. Saka Russia-i rara tepiyong Ukraine indang energy grid nung bomb pokloksüba langzüa parnokia Russia indang energy infrastructure nung tenük yoker.

Russia indang defence

ministry ajanga ashiba agi, par air defences ajanga yasüng Ukraine nunger indang drones 93 khazüka yok, aser item rongnung 60 bo Black Sea region nung liasü.

Russia-ia yasüng drones 83 mesüra drones 76 aser missiles tenet khaloktsü, aser item nungi 61 khazüka yok, ta Ukraine indang air force ajanga ashir. Parnokisa drones 16 aser missiles trok-i tesem ti nung targets nung kongshi ta ashi.

Brehostibarnü Kyiv nung amakdang nisung 31 tepsetba densema Ukraine nung civilian asoshi hopta tamajung ka aliba sülen iba ya ataloker.

Drones 300 dak tema aser cruise missiles ti amshi, anungji February 2022 nungi Russia-i tashi ajak amshia amak tenzüker Ukraine yimtiba nung taoba hopta ya tesashitiba amakba rongnung ka akumer.

Iba sülen Ukraine Tir Volodymyr Zelenskyy-i linük balala dang Russia nem temerenshi/tenokdangba tali tesashiba aser tashi taitba agütsütsü ayongzüker, aser US Tir Donald Trump-ia Ukraine nung Russia inyaksangshi aitsü aser Moscow anema tenokdangba tasern arutar ta ashi.

July ita, rara tembangtsü asoshi Putin ket nung anogo 50 lir, aji mesüra par totzü aser danga exports nung tenük yoker tariffs tesashi meshitsü, ta Trump-i shia liasü.

Hombarnü Trump-isa anogo tasen sükzüka anogo 10 mesüra 12 tsüngta rara tembangtsü ashi. Iba sülena ano pai mapang tasen latettsü, koba August 8 nü tembangtsü.

Israel sepaitemi Gaza nung teyari bushir nisung 20 dak tema tepset

Deir al-Bhala, Luroi/August 03 (Agencies): Israel sepaitemi Deobarnü Gaza nung chiyongtsü bushia aliba Palestine nunger nisung 23 tepset, ta mozüki ketdangsür aser tenük kuli alirtemi ashir.

Nisung million ana dak tema aliba Palestinian territory nung teimla samaba, timtemba, tetsübo aser tekangshi agi sünga lir, kong Israel-i mokdangar küm ana jungnüa amakba ajanga ayawara ajurur ta mongintemi ashir.

Gaza south len Nasser Hospital bushia nisung tasümgangbener aru ta ashir, aser item rongnung Khan Younis nung Gaza Humanitarian Foundation (GHF) ajanga lapoka aliba distribution site ka nungi kilometre asem shi puilar Teina nungia nisung tasümgang ti bener aru. GHF ya US aser Israel nati yariba private contractor temi ketdang asür, shirnoki ita ana jakdang nungi teyari oset lema agütsüba mapa inyaker.

Mozü kidangi Shakoush nungi tasümgang ka bener aru, koba Rafah nung GHF site ka nunger meters noklang ishika pilar lir. Morag corridor anasa sepaitemi teyari bushir nisung toku tepset ta ashi.

Teina aser Morag nung chiyongtsü bushir Palestine nunger nisung aseme osangbener dang ashiba agi, distribution points kati aoba lenmangnung injang khaloktsü, koba Israel sepaitemi amokbanga aliba military zones nung lir. Yasa-tzüra aliba nisungtem sepaitemi aodang sepaitemi injang khaloktsüba parnokii angu ta ashi.

Central Gaza nunga mozüki ketdangsür temi iba mesük ajangshiba indang ashi, kong Palestine nunger temi GHF indang pezü buba aser north tsütsü tatembangba distribution point atongtsü meranga aliba tsütsü Israel sepaitemi Deobarnep injang khaloktsü.

"Sepaitemi nisung marudaktsütsü meranga liasü.

Parnoki injang khaloktsü aser onok ajen. Nisung kar dak injang agi khashi," ta teyari bushir kati ashi.

Netzarim corridor anasa GHF indang tesem nung nisung pongu tepset aser 27 yiru, ta Awda Hospital ajanga ashi.

May 27 nungi July 31 tsüngta GHF-i lapoka aliba distribution sites nung nisung 859 tepsetogo aser UN-i aiba food convoys lenmang nunga nisung noklang aika tepsetogo, ta United Nations-i ashir.

UN-i lapokba nungbo rara tepiyong teyari osettem timtem makai agüja aru, saka Hamas-i item osettem agir ta Israel-i tai tongloksüba sülen May ita GHF ya tenzük. Auyaba indang Israel-i kuli agüja mali. UN-i yamaji masü ta ashir.

Nisung tali madenshitsü asoshi armed contractors temi pepper spray aser tekum dangtsü injang dang khaloktsü, ta GHF ajanga ashir. Israel indang mitkaria tekum dangtsü asoshi ang injang khaloktsü ta ashir.

Deobarnü nisung tepsetba atema Israel mitkari telangzüba agüja mali. GHF indang Media Office ajanga parnok anasa mesüra parnok alidak injang akhaba mali ta ashir.

Kasa mapang tesüiba ghonda 24 tsüngta achi-ajemtsü peria mongutetba ajanga Palestine nunger nisung tain trok süogo, ta Gaza health ministry ajanga ashi. Deobarnü asüba ajanga hopta pongu nung Palestine nunger nisung tain 82 achi-ajem peria monguteti süogo ta ashir.

Ministry-i rara nung asürtem azüngba nung achi-ajemtsü agi meperi asüba mezüngsemer.

Gaza nung 2023 küm rara tenzükba sülen achi-ajemtsü peria monguteti tanur 93 süogo, ta ministry ajanga ashi.

Deobarnü Israel indang far-right National Security Minister Itamar Ben-Gvir-i Jerusalem nung mangatettep aliba temeshi tesem nung sarasadem, koba Palestine nunger lenir aser Jordan aser Saudi Arabia

Dubai aser Abu Dhabi nung 2025 Men's T20 Asia Cup asayatsü

Luroi/August 3, 2025 (Agencies): Dubai aser Abu Dhabi nung September 9 nungi 28 tashi 2025 Men's T20 Asia Cup ayongzüka asayatsü.

Dubai nung final dena asaya 11 asayatsü aser Abu Dhabi nung asaya ti asayatsü. India team Group A nung UAE aser Pakistan den Dubai International Cricket Stadium nung September 10 aser 14 nü asayatsü aser Oman den asaya ya September 19 nü Sheikh Zayed Cricket Stadium, Abu Dhabi nung asayatsü.

"Asia Cup ya asayamung ka dang masü saka iba ya Asian cricket benjungba ka lir. Iba asayamung UAE nung ayongzüka asayaba ajanga

alima nung cricket asayaba tesem tajungtiba kati iba jangradem ya bener arutsü maongka agütsür. Asayar, fan tem aser broadcaster tem nem kecha tetsükdaksü makai world class tajangshiba agütsüsi atema Dubai aser Abu Dhabi na kanga junga renema lir," Asian Cricket Council (ACC) tir Mohsin Naqvi-i ashi.

India, Pakistan, UAE aser Oman nung Group A nung ata lir aser Group B nung Bangladesh, Sri Lanka, Afghanistan aser Hong Kong lir. Tang mezügbuba Asia Cup ya T20I format nung asayatsü lir.

Telok anaprongla nungi temaba jenjang nung tembangba

team ana Super Fours stage-i aitsü aser temaba jenjang nung tembangba team ana final asayatsü. Taküm asayamung nung mezügbuba asaya Afghanistan aser Hong Kong China na asayatsü.

India ya Asia Cup indang host lir, saka Board of Control for Cricket in India (BCCI)-i iba asayamung ya UAE nung ayongzüka asayatsü telemteba agiogo, kechiyong parnok tsünga aser Pakistan den iba atema mulungtepogo.

India team Asia Cup defending champions lir. Parnoki 2023 küm final asayaba mapang Sri Lanka akok, koba 50-over format nung asaya liasü.

Canadian Open nung Mboko-i Gauff tsükdaksüogo



Luroi/August 3, 2025 (Agencies): Deobarnü Montreal nung Canadian Open tetsür kija asaya nung Canada tsür rongnungi lanur asayar Mboko-i, top seed Coco Gauff tsükdakja quarterfinal tongtetogo.

Arishi küm 18 tain Canada tsürla, shiba nem main draw atema wildcard entry ka agüja liasü, lai minute 62 nung dang Grand Slam ana tashi koker alila ya 6-1 6-4 agi ayong ayonga kokogo aser la rangkings nung maneni tejakdangi tudar.

Gauff den asayaba mapang Mboko-i, break point pongu anguba nungi pezübo akok aser iba asayamung nung lai asaya pezü nung set ka nung dang

tamakok ngua lir.

"Ni asaya dak kanga junga rangloker liasü," ta Mboko-i ashi.

"Ni takok tashi süngjemshir asayatsü merang aser talisa nisung aika jakdang asayaba mapang süngjemshitsü meranga liasü. Iba ya kü atema tajangshiba tajung ka lir," ta lai ashi.

La taküm küm tetenzük nung world rankings nung jenjang 333buba nung liasü. Lai second-tier ITF Tour nung title pongu akokba mapang set ka nung danga tamakok mongui asaya 22 tashi atonga koka liasüliasü.

Mboko iba asayamung tenzükba mapang world

rankings nung jenjang 85buba nung liasü, saka Gauff akokba sülen la 53bubai tuogo aser quarter-finals nung Jessica Bouzas Maneiro den asayatsü, shiba la dang nungi jenjang ana agi dang tejakdang lir.

Iba asayamung nung Gauff-i maneni serve junga motet aser double faults trok mena liasü aser ajak senteper lai iba asayamung nung double faults 43 mena liasü.

"Lai tour nung takok aika nguyonga aotsü ta bilemer. Tarutsü nung küna aiben asayatsü ta bilemer," ta Gauff-i ashi.

Kasa asayamung nung second seed Iga Swiatek-i 6-2 6-2 agi Eva Lys akokba sülen la round of 16-i iogo.

Toronto nung Casper Ruud-i 6-4 7-5 agi Karen Khachanov kokogo aser top seed Alexander Zverev-a Francisco Cerundolo walkover achiba sülen quarter-finals-i iogo.

Tebur kija asaya nungsa Holger Rune-i 6-4 2-6 3-6 agi Australia nung asayar Alexei Popyrin makok.

Pakistan team WCL nung shilem magitsü PCB-i tenokdangba agütsü

Luroi/August 3, 2025 (Agencies): The Pakistan Cricket Board (PCB)-i, Pakistan team taruba World Championship of Legends (WCL) nung shilem magitsü atema tenokdangba agütsüogo.

Iba asayamung nung India-i Pakistan den masayatsü telemteba agiba sülen tang PCB-i iba telemteba ya agia liasü. India aser Pakistan na group stage nung asayatsü liasü saka social media nung mepetmesü adokba sülen asayamung ayongertemi iba asaya thitsü. Shikhar Dhawan, Suresh Raina aser tanga asayartemi iba asaya nung shilem magitsü atema telemteba agir liasü, anungji asayamung ayongertemi asaya thitsütsüsa dang aküm.

Maneni India team semifinal nung Pakistan den asayatsü

liasü, ajisüaka asayatsü anogo ka lia India team-i masayatsü telemteba agi aser Pakistan nem takok agüja parnok final-i indang indanga ai, kong parnoki South Africa mekoki liasü.

Deobarnü PCB-i official sangdong ka ajanga, asemüsü yimya benshiba atema WCL ayonger aija liasü. Mohsin Naqvi tekolak ser inyaksangshiba board yagi ashiba agi, WCL ayongertem yimya ngua tenokdangba agütsütsüsa dang aküm.

"Tarutsü nung World Championship of Legends (WCL) nung shilem magitsü tenokdangba agütsüba Pakistan Cricket Board (PCB)-i sangdonger. Mohsin Naqvi senden virtually agiba mapang PCB-i WCL asayamung lepa reprangshiogo, kong asayamung

ayongertemi pei mulung ka nung masayatsü telemteba team nem point agütsüba aser India vs. Pakistan legends asaya thitsüba indang WCL-i press releases agütsüba nung tashishitsü aliba densema lir," ta PCB-i ashi.

Kiralongrartemi Pahalgal amakba sülen Pakistan den asaya kecha masayatsü atema India nung tayongzükba tali kümdar.

Ajisüaka PCB-i WCL ayongertem indang osang ya shitak masü aser India o Pakistan na asaya thitsüba ya "cricketing merit" dak ajemdaker masü asü, ta ashi.

2buba WCL ya Honibarnü tembangogo. Edgbaston, Birmingham nung South Africa aser Pakistan na final asaya South Africa-i wicket teku agi koka liasü.

Dr. T. AO TROPHY					
24 TH INTER-DISTRICT FOOTBALL CHAMPIONSHIP 2025					
GROUP STAGE FIXTURE					
MATCH NO.	GROUP	TEAM	DATE & TIME		
MATCH 1	D	KOHIMA VS TSEMINYU	01/08/25 1500 HRS		
MATCH 2	A	TUENSANG VS MON	02/08/25 0900 HRS		
MATCH 3	B	LONGLENG VS CHÜMOUKEDIMA	02/08/25 1100 HRS		
MATCH 4	C	MOKOKCHUNG VS WOKHA	02/08/25 1300 HRS		
MATCH 5	D	PEREN VS MELURI	02/08/25 1500 HRS		
MATCH 6	A	SHAMATOR VS NIULAND	04/08/25 0900 HRS		
MATCH 7	B	NOKLAK VS DIMAPUR	04/08/25 1100 HRS		
MATCH 8	C	PHEK VS KIPHIRE	04/08/25 1300 HRS		
MATCH 9	A	ZUNHEBOTO VS TUENSANG	04/08/25 1500 HRS		
MATCH 10	D	MELURI VS KOHIMA	05/08/25 0900 HRS		
MATCH 11	B	CHÜMOUKEDIMA VS NOKLAK	05/08/25 1100 HRS		
MATCH 12	C	KIPHIRE VS MOKOKCHUNG	05/08/25 1300 HRS		
MATCH 13	A	MON VS NIULAND	05/08/25 1500 HRS		
MATCH 14	D	TSEMINYU VS PEREN	06/08/25 0900 HRS		
MATCH 15	A	SHAMATOR VS ZUNHEBOTO	06/08/25 1100 HRS		
MATCH 16	C	WOKHA VS PHEK	06/08/25 1300 HRS		
MATCH 17	B	DIMAPUR VS LONGLENG	06/08/25 1500 HRS		
MATCH 18	A	SHAMATOR VS TUENSANG	07/08/25 0900 HRS		
MATCH 19	D	MELURI VS TSEMINYU	07/08/25 1100 HRS		
MATCH 20	A	ZUNHEBOTO VS NIULAND	07/08/25 1300 HRS		
MATCH 21	B	NOKLAK VS LONGLENG	08/08/25 0900 HRS		
MATCH 22	A	MON VS ZUNHEBOTO	08/08/25 1100 HRS		
MATCH 23	B	DIMAPUR VS CHÜMOUKEDIMA	08/08/25 1300 HRS		
MATCH 24	D	PEREN VS KOHIMA	08/08/25 1500 HRS		
MATCH 25	C	KIPHIRE VS WOKHA	09/08/25 0900 HRS		
MATCH 26	A	TUENSANG VS NIULAND	09/08/25 1100 HRS		
MATCH 27	C	PHEK VS MOKOKCHUNG	09/08/25 1300 HRS		
MATCH 28	A	MON VS SHAMATOR	09/08/25 1500 HRS		

Callum Wilson West Ham nung denogo



Luroi/August 3, 2025 (Agencies): Premier League club West Ham-i England nung forward Callum Wilson, English club Newcastle United nungi anir aoba Deobarnü metetdaksüogo.

Arisih küm 33 tain England nung asayar, shibai PL asaya 230 dak tema nung goal 100 dak tema idaktsür lir pa angati West Ham nung denogo aser küm ka atema tenangzüktepba yangluogo.

"West Ham amala club tulu ka nung adenba atema ni kanga pelar. Iba club aser kü tejangraba, bendanga agüja meranga inyakba ajak mesükteper aser nia takok angutsü atema meranga asayar asünung idaki adenba atema pelar," ta Wilson-i ashi.

"Ni tayongzüba balala ajangshia aotsü yongyaseta atar. Squad nung sempet tajung aketba asayartem aika lir aser iba den coach-a kanga tajung lir. Pa lenisüba nung asayar aser staff tem ajak nukjidong tongtettsü atema kasa lenman nung jajadar, koba league nung takok tashi temaba jenjang nung tembangtsü asoshi lir," ta pai ashi.

Kasa mapang nung West

Ham manager Graham Potter-i Wilson amala asayar tajung ka anisemba atema kanga pelaba lemsatepogo.

"Onoki Callum West Ham United-i pelashishia agizüker," ta Potter-i ashi.

"Pa ya Premier League nung tajangshiba aika bena aliba striker ka lir. Pai kanga meranga inyaker aser pa dak goal idaktsütsü tashi aliba kuli lir. Pa yimayimponga kanga tajung, koba onoki asayartem anisemba mapang kanga rangloker inyakba lenla ka lir," ta West Ham coach yagi ashi.

"Onoki squad kanga junga yanglur lir aser Callum densemba ajanga tashi taitba kümdaktsütsü. Pai aika ajungmesotsü, talisa lanur attacking asayartem ajungmesotsü aser pa dak lenisütsü sempeta keta lir," ta paisha shisem.

Wilson shiba 2009 küm Coventry City nungi senior career tenzükba liasü, pa Kettering Town aser Tamworth nung loan nung oa asayaba sülen 2014 küm Bournemouth-i ao. Iba club nung pa kanga junga asaya tenzük aser iba ajanga pa 2020 küm Newcastle United-i alizükba liasü.

BILEMDANGANG

"Anogoshia langka tasen angazüktsü maongka lir."